

RONA/CRAPPA NAIRA

Blers «dieschs» per igls organisatours

L'amprema da tschintg fegns d'emda dalla Festa federala da teir a Rona ed a Crappa Naira è gio passada. Tiradours e tiradouras ple tgi cuntaints e nigns problems cun la tecnica. Participants e participantas on pernotto an Surses ed er an Val Alvra.

GION NUTEGN STGIER/FMR SURMIRAN

Da venderde passo anfignen dumengia vers seira èn er nias tratgs a Rona ed a Crappa Naira ples stetgs dalla pi gronda occurrenza da sport 2026 an Svizra, la Festa federala da teir. Sen tots dus stands da teir è sto bler travagl, igl èn nias sagettos bungs resultats e tiradours e tiradouras èn stos cuntaints cun l'organisa-ziun a Rona ed a Crappa Naira. Ludada è al-loura er neida la hospitalitad digls organisa-tours e dallas organisatouras e digls blers vo-luntaris e voluntarias.

Not Netzer, igl president digl comite d'or-ganisaziun local a Rona fò an tots gros ena bi-lantscha positiva digls amprens deis dalla Fe-sta federala da teir 2026. El dei: «Igls parti-ci-pants e las participants on galdia da trer lour program sen en stand pi pitschen noua tgi tot è pi famigliar.» Angal cumplimaints vegia el retschet, chegl ò er detg Hardi Gruber, tgi stat agl timung digl comite d'organisaziun local a Crappa Naira.

«On parle français»

Igls treis deis tg'è nia sagetto a Rona ed a Crap-pa Naira ins ò ple u manc angal santia a discor-rer franzos. Dialect bernes è alloura er nia dis-curria cunzont a Crappa Naira, dantant tgi a Rona è durant la davosa fegn d'emda nia dis-curria er taliang. La raschung è tgi la «Societad tiratori Biaschesi Biasca» ò sagetto igl program da teir a Rona. Cutier ò l'uniun gia aint igl Ho-tel Aves a Savognin. Er sagetto a Rona sen chel stand on plessas uniuns dalla Romandie, scu per exaimpel «Villars-sous-Yens Tir sportif Le Chaney» e l'uniun «Sorens Société de tir».

Scu gio dalla Festa cantunala da teir igl 2012 aint igl Grischun Central ò la Societad da teir Maladers er sagetto la davosa fegn d'emda a Rona. Erika Loretz, commembra da chella uniun ò detg: «Nous vagn sapientiva-maintg tscharnia igl stand da teir tg'è igl pi



Igls tiradours e las tiradouras da Malader on sagetto lour program a Rona e pernotto è nia a Savo-gnin aint igl BB La Tgamona.

FOTO GION NUTEGN STGIER

gliunsch davent da Coira, chegl per tgi possans star sur notg e galdeir an cuminanza la festa.» Er igls tiradours e las tiradouras dallas uniuns da teir dalla Svizra franzosa on detg tg'ins vegia lia sagettar a Rona ed a Crappa Naira er per star ainten la regiun sur notg e per avoir legher e buna cumpagneia.

Da Beiva anfignen Churwalden

Or vista turistica è l'occurrenza da teir naziu-nala sa tgapescha er interessanta. Chegl er schi dat aint igl Grischun Central turistichers tgi vardan la festa per en event tgi porta pac ed ena occurrenza tgi atteira strousch aspecta-tours (durant en meis vignan igls 36 000 tira-dours accompagneas da radond 100 000 per-sungas). Realitad è tgi la davosa fegn d'emda

on uniuns da teir pernotto betg angal en de, mabagn er ples, chegl a Savognin, Cunter, Ca-sti, Lantsch, Lai, Parpan, Valbella ed a Chur-walden. Ainten la regiun da vacanzas da Lai on cunzont er pernotto tiradours e tiradouras tg'on sagetto a Coira u er a Crappa Naira e schizont a Rona. Stos sur notg èn participants e participantas per exaimpel er a Rona ainten dus abitaziuns, agl campadi ed er ainten ena tgesa da colonias. Bler travagl durant la davosa fegn d'emda ò er gia igl restaurant digl cam-padi a Rona ed er a Savognin, Cunter, Casti ed a Lai e conturn.

Tot piglia on igls tiradours e las tiradouras betg angal ludo l'organisaziun e scu tigl teir at-tribuia agls organisatours blers «dieschs», ma-bagn er agls hotels noua tg'els on pernotto.

SAVOGNIN

L'Hotel Danilo daventa in Coop

A Savognin al lieu da l'Hotel Danilo datti ina surbajegiada cun pliras abitaziuns e butias. Tranter auter vegn er il Coop a sa chasar en il Surses. La possessura da l'immobiglia, la Salve SA, ha communitgà che la vischnanca haja dà il permiss da construcziun.

CDM/RTR/FMR RUMANTSCH GRISCHUN

En il lieu da l'Hotel Danilo a Savognin ch'è stà durant decennis in punct d'inscunter cun sia discoteca legendarà è planisada ina surba-jegiada cun abitaziuns e butias. La vischnan-ca da Surses ha quests dis dà la permissiun da construcziun per il project «Residenza Dani-lo», ha communitgà la possessura da l'immo-biglia, la firma Salve SA cun sedia a Gamba-rognò en il Tessin.

Part da l'interpresa fan Beat Hug, ch'ha gia realisà il resort Surses Alpin, sco era Luzi Tho-mann, il president dal cussegl d'administra-ziun da la Salve SA ed anteriur president da la societad anonima da turissem da Surses.

Finamira dal project saja tenor ils investurs da stgaffir in nov lieu da scuntrada per indi-genas e turists.

En il plaunterren in Coop

En ils dus plauns sura da la nova residenza ve-gnan construidas 18 emprimas abitaziuns per affittar cun ina grondezza tranter 2,5 e 4,5 chombras. Per ils locataris da las abitaziuns stat er a disposiziun in parcadi sutterran cun radund 50 piazzas da parcar.

En il plaunterren è planisà ina fatschenta da fluras, in café, ina filiala da la Banca chantuna-la ed ulteriuras butias. Era planisà en il plaun-terren è ina butia dal Coop cun ina surfatscha da 550 meters quadrat. La filiala dal Coop fiss l'emprima ch'i dat en la Val Surses. Sco quai ch'il grossist communitgescha a las medias «da-



Ina visualisaziun dal nov project che rempiazza l'Hotel Danilo amez Savognin.

FOTO MAD

stgan clientas e clients sa legrar sin in attractiv concept da butia cun blera laina ed ina illumi-naziun moderna». Gist avant la butia vegni a dar parcadis per radund 30 autos.

Plans per la parcella 4042 na vegnan betg perseguitads

Fin uss aveva Coop planisà in project separà en in auter lieu a Savognin, numnadamain sin ses

agen terren a l'entrada dal vitg, dasper il tanca-di sin la parcella 4042. Quest plan oriund da construir là ina filiala na vegnia betg persequi-tà vinavant, pon ins leger vinavant en la com-municaziun dal mardi. Tge che capita cun quest terren saja anc avert.

L'avertura dal nov center al lieu da l'antieriur Hotel Danilo è planisada la stad 2028.

SURSES

Lai Burvagn sustegna puspè la producziun da forza electrica

Il Lai da Burvagn en il Surses è puspè en funcziun. Quai suenter ina fasa cun lavurs da bunamain dus onns. Cun las adattaziuns adempleschia il lai puspè las leschas – quai che pertutga la quan-titad d'aua restanta necessaria, scriva l'ovra electrica da Turitg en ina comunicaziun. Vitiers ha l'interpresa construi in nov im-plant electric pitschen. Quel producescha cun l'aua restanta fin ad in'ura gigawatt forza electrica. Quai tanscha per il consum da radund 220 chasadas grischunas. (rtr/fmr)

BRAVUOGN

Linard Nicolay expona «Intervals 26»

Linard Nicolay preschenta per la quarta giada ina schelta da sias ovras a Bravuogn en il Talvo Chesa Orta. Sco che l'artist da Bra-vuogn scriva en ina comunicaziun a las medias, vegn exponi-da sut il titel «Intervals 26» ina seria expressiva da plasticas da

fier, marmel, lain e giess. La vernissascha da la nova expo-siziun è venderdi ils 12 da zercladur a las 14.00. An-dreas Gabriel e Cristina Ja-nett embelleschan quella musicalmain. Silsuenter pon ins visitar l'exposiziun fin ils 22 d'avust mingamai sonda e dumengia tranter las 13.00 e las 18.00. (cdm/fmr)



Per la quarta giada expona Linard Nicolay ina seria da plasticas en il Talvo Chesa Orta a Bravuogn. FOTO MAD

LANTSCH

Ena seira da stad tranter glisch e tungs

Cun canzungs da la seira e da premaveira tgi stattan sot igl te-tel «Der Lenz ist da!» anveidan igls Acappellisti la mesemda, igls 17 da zarcladour 2026 allas 19.30, ad en concert aint igls meirs dalla Baselgia Viglia da Lantsch. Tenor ena comunica-ziun allas medias digls Acappellisti spetga en mument musical quiet, insistent e plagn sentimaints cun canzungs da la seira e da premaveira.

Igl quartet – Patric Collet, Peter Nägeli ed igls frars, Armon e Martin Ulber, uriunds da Lantsch – sa deditgescha agl cant a capella an sia furma pura. Sainza accompognamaint instrumen-tal nescha en maletg da tungs tgi veiva sulettamaintg da la pre-cisiun, l'expressiun e digl gi dinamic dallas vouchs virilas. Igl program magna tenor la comunicaziun tras differentas epocas digl taimp, dalla renaschientscha anfignen tigl taimp preschaint, ed unescha canzungs an rumantsch, tudestg, franzos, spagnol ed engles. (cdm/fmr)

L'antrada è libra, i vign rimnada ena collecta.



Igls Acappellisti durant en concert a Spleia (da san.): Armon Ulber, Patric Collet, Peter Nägeli e Martin Ulber.

FOTO MAD/ACAPPELLISTI

TUMLEASTGA

Spassageada da casti a casti

La gievgia digls 11 da zarcladur magna Andrea Raguth Tschar-ner la spassageada da casti a casti an Tumleastga. La partenza e a las 13.30 a la staziun da la pendiculara a Razén. Anunztgas en da far antocen la 16.00 digl gi avànt al Turissem Viamala, 081 650 90 30, info@viamala.ch. La contribuziun amporta 10 fràncs. (fmr/bt)